

詞

綜

補

遺

序

詞家之有總集自孟蜀花
間宋初尊前以迨南宋金
元舊選本今尙存者十餘
種各萃羣腋千蹠自成一
家唯世異方殊若淮濟之

分流而非歸墟之總匯明
人雖彙輯各代有詞林萬
選草堂廣集等書持擇旣
未精蒐羅亦不備槩等諸
自鄒以下焉我

朝朱竹垞太史惜三百年

來詞學不振廣蒐博采薈
萃四代之菁華成詞綜一
書鑒別精審辨訂詳核誠
集倚聲之大成而爲藝苑
之盛事矣顧鄧林雖大安
能罄豫章之材滄海所遺

未必無照乘之寶况逢

國家人道化成文教日盛

自開四庫以來寓內新出

之書不下千百種多昔賢

所未經見者此陶子臯薌

所以有詞綜補遺之選也

臯薌夙工長短句所著紅
豆樹館詞早年傳播詞壇
曾游王蘭泉司寇之門司
寇輯明詞綜

國朝詞綜時相與共商推
是書積數十年心力自各

家專集古今選本外凡宋
元人所著錄以及小說卮
言郡國志乘無不涉獵自
唐迄元成二十卷去取別
裁編纂體例悉宗竹垞太
史舊指不及明者亦仍前

書斷限也當時汪晉賢氏
近今蘭泉司寇各有補遺
此書後出攬括尤富碎金
片玉無不畢收信足羽翼
原書並垂不朽矣鳧薌以
余狃識寓聲間有討論屬

爲弁齒未可以不文辭聊
識其顛末云耳

道光甲午暮春同館友弟
孔昭虔譔

詞綜補遺凡例

詞選昉於花間尊前集自宋以逮明季作者數十家然
非流於纖靡卽失之蕪雜至竹垞詞綜出始一歸雅
正第成書時宋元人詞選海內流傳尙罕而專集之
續出於數十年後者正復不少余於嘉慶庚申辛酉
間王蘭泉司寇延訂續詞綜曾刻補遺二卷每以採
摭未廣爲憾同志中錢塘何夢華元錫倪米樓稻孫
常錄示鮑氏知不足齋未刊之本仁和朱聞齋文藻
吳江史赤崖善長鎮洋彭甘亭兆蓀嘉定錢同人侗
於三泖漁莊王氏書庫暨江浙藏書家互相搜訪雪

纂露鈔較之向時所得不啻倍蓰嗣以服官中外舊稿久不檢視今春郡閣餘閑重加詮次釐爲二十卷體例悉仿原書亦古人述而不作之意爾

詞綜成於康熙戊午閱十三年辛未汪氏晉賢又有補人補詞各三卷據自序稱竹垞北去後與沈山子周青士商榷補輯顧所采僅梅苑翰墨全書絕妙好詞鐵網珊瑚四種未爲賅備如王十朋點絳脣詞見於詞綜十一卷重複列入又誤以黃簡爲黃蘭王德璉爲王璉并不知夢菴之爲張肯率多重複舛誤前後如出兩手茲集所補總以竹垞三十卷爲準凡唐宋

金元詞人見遺於前集者悉加甄錄至補詞則未遑
兼及也

竹垞選輯詞集凡一百六十餘家徵引既多踈漏不免
如倪偁綺川詞一卷姚述堯蕭臺公餘詞一卷邱密
文定公詞一卷楊澤民續和清真詞一卷許棐梅屋
詩餘一卷喬吉惺惺老人樂府一卷張可久小山樂
府二卷凡例內雖經載入而詞則闕如又魏了翁鶴
山長短句三卷張繼先虛靖真人詞一卷雖云覽觀
並未入選餘如李光莊簡集十八卷附詞李綱梁溪
集一百八十卷附詞胡銓澹菴長短句一卷米友仁

陽春集一卷曹冠燕喜詞一卷王之望漢濱集十六
卷附詞袁去華宣卿詞一卷程大昌文簡公詞一卷
陳三聘和石湖詞一卷李呂澹軒詞一卷楊冠卿客
亭類稿十五卷附詞王炎雙溪集二十七卷附詞韓
澆澗泉詩餘一卷劉學箕方是閑居士小稿二卷吳
淵退菴遺集一卷附詞王邁臞軒集十六卷附詞吳
則禮北湖集五卷附詞吳仲方虛齋樂府一卷趙崇
嶠白雲小稿一卷附詞王謙潛泉蛙吹集一卷衛宗
武秋聲集六卷附詞万俟紹之郢莊吟稿附詞姚勉
雪坡詞一卷陳著本堂集九十二卷附詞歐良撫掌

詞一卷梁棟隆吉集附詞黎廷瑞芳洲集三卷附詞
徐瑞松巢漫稿三卷附詞李好古碎錦詞一卷汪元
量湖山類稿五卷附詞李俊民莊靖集附詞白樸天
籟集二卷張伯淳養蒙先生詞一卷姚燧牧菴詩文
集三十六卷附詞王結文忠公集六卷附詞蒲道源
閒居叢稿二十六卷附詞趙雍待制遺稿一卷王奕
東行斐稿三卷劉壘水雲村詞一卷吳存樂菴詩集
二卷附詞陳櫟定宇集十六卷附詞胡炳文雲峯集
十卷附詞陸文圭牆東類稿二十卷附詞朱晞顏瓢
泉吟稿五卷附詞李孝光五峯集六卷附詞皆原選

所未收至曾慥樂府雅詞三卷拾遺二卷周密絕妙
好詞七卷趙聞禮陽春白雪八卷外集一卷向日祇
有鈔本傳播未久而陽春白雪內尤多他選未見之
作今悉爲補錄

昔人之詞有本集已佚附見他人集中而零章碎句載
於稗官野乘者尙多茲選所錄如王仁裕開元天寶
遺事郭茂倩樂府詩集何光遠鑒誠錄鄭文寶南唐
近事龍衮江南野史金鳳外傳釋文瑩湘山野錄續
湘山野錄龔明之中吳紀聞吳垞五總志釋曉瑩羅
湖野錄李昌齡樂善錄秦觀淮海集韓維南陽集釋

道潛參寥集辛棄疾南燼紀聞朱弁風月堂詩話續
軌微說蔡條鐵圍山叢談葉適習學紀言趙令時侯
鯖錄范公偁過庭錄周輝清波雜志王灼碧雞漫志
曾敏行獨醒雜志上庠錄王銍雪溪集方勺泊宅編
葉夢得避暑錄話石林詩話魏泰臨漢隱居詩話復
齋漫錄羅大經鶴林玉露洪邁夷堅志王得臣塵史
鄧肅栢欄集張仲宗廬川歸來集劉過龍洲道人小
集劉仙倫招山小集鄧忠臣同文館倡和詩集程洵
尊德性齋集葉紹翁四朝聞見錄王明清揮麈錄揮
麈餘話王照新志吳曾能改齋漫錄晁公武郡齋讀

書志趙希弁讀書附志陳振孫書錄解題費衮梁溪漫志沈作喆寓簡張邦基墨莊漫錄趙與時賓退錄樓鑰攻媿集劉子翬屏山集朱子晦菴集周必大二老堂詩話平園續稿劉克莊後村集後村千家詩陸游劍南集姜夔白石道人集戴復古石屏集陳鵠耆舊續聞張端義貴耳集岳珂程史王楙野客叢書彭乘墨客揮犀趙汝鐸野谷詩集葛天民無懷小集孫雲翼李梅亭先生小傳邵博聞見後錄周弼端平詩傳趙汝騰庸齋集胡仔茗溪漁隱叢話吳子良方巖集序趙師秀清苑齋集徐照芳蘭軒集徐璣二薇亭

集趙汝回薛瓜廬集序王綽薛瓜廬墓誌施樞芸隱
橫舟稿李龔剪綃集李曾伯可齋類稿鄒登龍梅屋
吟黃敏求橫舟小稿朱繼芳靜佳乙稿許棐梅屋小
稿樂雷發雪磯叢稿胡仲弓葦航漫游稿吳錫疇蘭
皋集毛珣吾竹小稿王琮雅林小稿王同祖學詩初
稿柴望涼州鼓吹柴氏四隱集蘇幼安柴秋堂墓誌
吳文英夢窗甲乙稿陳允平西麓詩稿釋斯植采芝
集陳起前賢小集拾遺楊纘作詞五要周密武林舊
事齊東野語癸辛雜識浩然齋雅談志雅堂雜鈔澄
懷錄蘋洲漁笛譜方岳深雪偶談俞文豹吹劍錄外

集黃震古今紀要逸編無名氏宋季三朝政要陳世
崇隨隱漫錄董嗣杲廬山集英溪集釋居簡北碕詩
集董史皇宋書錄韋居安梅磡詩話俞宗大曹梅南
摘稿序劉壎隱居通議水雲村泯稿符遂劉水村傳
方回瀛奎律髓桐江集李祉陳盼兒傳樂府紀聞寶
祐四年登科錄謝朝天地間集應廷育金華先民傳
無名氏宋遺民錄宋舊宮人詞李鶴田湖山類稿跋
劉祁歸潛志元好問中州集中州樂府遺山集鮮于
樞困學齋雜錄仇遠稗史張之翰秋聲集序盛如梓
老學叢談王逢梧溪集張炎詞源吳澄草廬集蘇天

爵滋溪集陳泰所安遺稿鳳林書院名儒草堂詩餘
楊維禎鐵崖集可傳集序樊士寬文章善戲孔行素
至正直記劉堅消夏錄魏慶之詩人玉屑西江詩話
張雨貞居詞夏文彥圖繪寶鑑陶宗儀書史會要輟
耕錄蔣子正山房隨筆偶桓乾坤清氣集郊韶雲臺
集朱存理鐵網珊瑚汪珂玉珊瑚網張丑清河書畫
舫愚見紀忘法苑春秋天目中峯筆記太和正音都
叩三餘贅筆文徵明許初趙待制詩詞卷跋張綸林
泉隨筆楊慎丹鉛總錄詞林萬選項鼎鉉呼桓日記
袁易靜春堂集吳訥靜春堂元賢遺墨跋焦竑國史

經籍志陳耀文花草粹編姜紹書韻石齋筆談朱謀
璣畫史會要汪森粵西詩載曹庭棟宋百家詩存高
層雲改蟲齋筆疏李宗孔宋稗類鈔徐鉉詞苑叢談
卓珂月詞統厲鶚絕妙好詞箋共計一百八十七種
又地理書藝文之後間附詩餘如范成大吳郡志周
應合景定建康志潛說友咸淳臨安志劉一清錢塘
遺事張鉉至大金陵新志袁桷延祐四明志田藝蘅
西湖游覽志餘鄧牧洞霄圖志孟宗寶洞霄詩集王
鏊姑蘇志文肇祉虎邱志吳子良赤城志管大勳臨
江府志林表民赤城續志天台續集別編京口三山

志近時稽曾筠浙江通志王士俊河南通志劉於義
陝西通志覺羅石麟山西通志郝玉麟福建通志嚴
州府志李衛西湖志均經瀏覽此又前人採錄所未
及也

自來碑版文字鐫刻詩詞者絕少吳曾能改齋漫錄載
太白桂殿秋二首得於石刻劉無言倚聲歌之音極
清雅余從唐宋以後金石頻年搜訪如梁安世西江
月見臨桂樓霞洞石刻朱晞顏南歌子見臨桂水月
洞石刻方信孺西江月見臨桂龍隱巖石刻張友仁
吳千能水調歌頭見淡巖石刻黃應武百字令見臨

桂元巖石刻曾宏正水調歌頭見臨桂水月洞石刻
僕散汝弼風流子見臨潼石刻張養浩感皇恩見蘇
天爵七聘堂石刻姜彧浣溪沙二首鷓鴣天一首見
晉祠石刻以及王壽如夢令酌江月二詞見終南山
石刻挂金燈詞見寧海州石刻馬鈺滿庭芳見濰縣
玉清宮石刻釋覺達鷓鴣天見長清靈巖寺舉公壽
塔碑釋智文鷓鴣天見長清亨公壽塔記邱處機水
龍吟見登州虛亭石刻漁家傲見長春園石刻無俗
念梨花詞見靈虛宮石刻舉凡禪宗偈語羽士鼓子
詞之類亦多所采擇然以天下之大幽巖邃壑古人

題咏往往搜剔所不到其爲風雨剝蝕苔蘚掩薶者
更不知凡幾自維株守一隅見聞謏陋海內嗜古之
士或有篋衍舊藏或從巖洞新搨惠而好我不啻百
朋之錫已

明代誤著類夸誕失實甚至僞造名目改換卷帙亦其
積習使然如楊用修詞林萬選序稱藏有唐宋五百
家詞考書錄解題所載自唐至五代不過南唐二主
詞馮延巳陽春錄及趙崇祚花間集而已南北宋則
自家宴集以下總集別集共一百七家前明毛子晉
所收亦止六十家安得有五百家之多其言本不足

詞源卷下
據又如張叔夏詞源上下二卷陳氏祕笈割去上卷
以下卷并入陸輔之詞旨改稱樂府指迷不知沈伯
時另有其書是不但貽悞後人抑且重誣古人矣茲
選除專集外所輯各詞一一詳明出處以期徵信

詞集以時代先後爲斷此大概體例也茲選補錄唐詞
本屬寥寥至宋金元詞人以科目詮次其無科目可
考而散見同時各集者卽附其人之後或爵里旣已
無徵名姓亦復罕見則以各選本先後依次排比至
徵引各書或不切於本詞而有關於時政得失人材
進退者間仿樊榭宋詩紀事之例附錄於後明知不

免泛濫冀於知人論世之學不無裨益耳

萬氏詞律於一腔一調必有發明時中肯綮較之張綖之詩餘圖譜程明善之嘯餘譜毛先舒之詞學全書固已遠勝然書成於嶺外未能博觀羣籍踈於考證如趙與仁西江月醉春風見於絕妙好詞詞律一以爲趙以仁一以爲趙德仁是一人而屢易其名王觀天香詞誤作王充陳允平永遇樂誤作陳元平至失載宋詞諸調尤不免挂漏之譏茲選內如李光之瑣臺杜龍沙之夾鐘商門雞回平韻雨霖鈴周端臣之春閨怨清夜游兩越調王玉之青門怨杜良臣之平

韻三妹媚蘇茂一之平韻祝英臺近權無染之孤館
深沈馮子振之鸚鵡曲劉壎之湘靈瑟均未載入又
如俞秀老之阮郎歸張燾之雨中花慢陳著之摸魚
兒丁默之華胥引胡翼龍之宴清都史深之玉漏遲
沈唐之霜葉飛字句長短互異亦未編入又一體後
有精於律呂者因萬氏之疎略重加訂正以救失而
補缺則予之搜討似不爲無助也

詞有因人而重不計工拙者卽有宋一代而論如李忠
定之經濟韓忠武之勲業李莊簡之方正胡忠簡之
伉直歐陽全美之忠義高彥先之氣節其天真流露

足與日月爭光又如魏鶴山之理學晁子止之淹博
潘子賤之廉介韓澗泉之高尙雖非專門名家其詞
亦足垂不朽凡無關於國事重輕人倫臧否者姑勿
具論若劉無言附朱勔而訂婚姻張彥實藉秦相而
知制誥許深甫屈膝於平原陳惟善貢諛於秋壑以
及江朝宗曹宗臣高續古廖羣玉朱謙父輩依附權
門人無足取而文采流傳亦難概從刪汰至蔡京誤
國之罪不可勝誅揮麈後錄稱其貶潭州時作西江
月詞有玉殿五回命相形廷幾度宣麻之語尤爲無
恥特屏斥之以示巷伯惡惡之意

殘編斷簡類多魯魚亥豕之訛茲選宋元人專集及樂府雅詞陽春白雪二書俱得自舊鈔其間竄易增改之處今悉爲校正至字畫漫滅不可辨認者姑闕疑以仍其舊餘如泊宅編載沈注贈楊蟠詞云竹閣雲深巢虛人間幾年湖上音塵寂風流今有使君家月明夜夜聞雙笛計二十九字似非全詞西湖志餘載葉李贈賈似道詞云君來路吾歸路來來去去何時住公田關子竟何如國事當時誰與誤雷州戶崖州戶人生會有相逢處客中頗恨乏蒸羊聊贈一篇長短句計五十四字詞譜列入金錯刀語近詼諧又宣

和遺事載賈奕南鄉子詞尤鄙俚概置不錄

著書欲求考據之精詳尤貴搜羅之宏富惟載籍極博勢難遍觀而盡識余昔備官翰林見永樂大典內間有宋元人詞集爲外間未見之書因塵務拘牽未遑鈔錄茲選凡得唐宋金元詞一千三百二十六首計四百五十五家此外如劉儀鳳奇堂樂府一卷曾布之丹邱使君詩詞一卷見宋史藝文志朱長文樂圃餘稿十卷附詞華鎮雲溪居士詞一卷吳芾湖山長短句三卷陳普石堂遺集四卷附詞宋伯仁烟波漁隱詞二卷游九言默齋遺稿二卷附詞程從龍梅軒

集四卷附詞謝應芳龜巢詞一卷趙汭東山存稿七
卷附詞見四庫全書總目又隱居通議稱吳允文浚
精於長短句均未得其隻字由是知古人詞集其涇
沒而不彰者何可勝道名山韞櫝難窮不盡之藏滄
海求珠轉益無涯之歎而世之敝帚自享者輒謂得
一已足亦適形其陋矣

嘉慶丁卯予應京兆試出曲阜孔荃溪先生之門先生
湛深經術尤好倚聲之學因以所輯舊稿就質辱荷
評泊多所指正至於編次校讐則賴錢塘吳更生長
卿之力更生舊在青浦與甘亭同人諸君子同訂湖

海詩傳蘭泉司寇年譜中所稱吳秀才引年其原名
也將付剞劂並書之以誌師友之益云

詞綜補遺凡例

詞綜補遺總目

長洲 陶 樑 編輯

大興 李雲章 參訂

金匱 楊夔生 辨譌

錢塘 吳長卿 校定

卷一 唐五代十國宋詞四十六首

卷二 宋詞四十七首

卷三 宋詞六十九首

卷四 宋詞七十三首

卷五 宋詞七十七首

卷六

宋詞六十八首

卷七

宋詞七十三首

卷八

宋詞五十六首

卷九

宋詞八十一首

卷十

宋詞七十一首

卷十一

宋詞五十一首

卷十二

宋詞六十六首

卷十三

宋詞六十八首

卷十四

宋詞八十六首

卷十五

宋詞七十九首

卷十六

金詞六十八首

卷十七

元詞六十五首

卷十八

元詞六十三首

卷十九

元詞五十七首

卷二十

元詞六十二首

詞綜補遺總目

詞綜補遺卷一

長洲 陶 櫟 緝

唐詞十一首五代十國詞十一首宋詞二十四首

元宗皇帝 一首

李景伯 一首

崔 液 二首

張松齡 一首

竇宏餘 一首

康 駢 一首

崔懷寶 一首

杜 牧 一首

張希復 一首

鍾 輻 一首

庾傳素 一首

劉保乂 一首

歐陽彬 一首

許 岷 二首

林楚翹 一首

陶穀 一首

徐鉉 二首

閩后陳氏 二首

欽宗皇帝 一首

蘇易簡 一首

陳堯佐 一首

丁謂 二首

王益 一首

吳感 一首

趙忭 二首

杜衍 一首

蘇舜欽 一首

劉敞 一首

曾布 一首

沈括 四首

韓維 二首

劉几 一首

丁注 一首

孔武仲 一首

劉頴一首

俞紫芝一首

元宗皇帝

王仁裕開天遺事明皇諸音律善度曲嘗臨
軒縱擊製一曲云春光好方奏時桃李俱發
又製一曲云秋風高奏之風雨颭然帝曰此
時不喚我作天公可乎詞俱失傳唯好時光
一闕云云

好時光

見全唐詩餘

寶髻偏宜宮樣蓮臉嫩體紅香眉黛不須張敞畫天教
入髻長莫倚傾國貌嫁取箇有情郎彼此當年少莫
負好時光

李景伯

懷遠子景龍中爲給事中
遷諫議大夫終散騎常侍

郭茂倩樂府詩集回波商調曲唐中宗時造
蓋出於曲水引流觴也後亦爲舞曲教坊記
謂之軟舞大唐新話景龍中中宗嘗遊興慶
池侍讌者遞起鼓舞并唱回波詞給事中李
景伯亦起舞歌詞云云

回波樂

見全唐詩餘

回波樂時酒卮微臣職在箴規侍讌旣過三爵喧譁竊
恐非儀

崔波

字潤甫安喜人景龍
中官至殿中侍御史

踏歌詞

見全唐詩餘

綵女迎金屋仙姬出畫堂鴛鴦裁錦袖翡翠貼花黃歌
響舞分行艷色動流光

又

庭際花微落樓前漢已橫金壺催夜盡羅袖舞寒輕樂
笑暢歡情未半著天明按此詞五言六句與拋毬樂相
似惟與第五句用韻不同或將
第二首末二句作上七言下三言讀改入詞調者誤

張松齡

一名鶴齡金華人
志和兄官浦陽尉

釋曉瑩羅湖野錄張松齡以漁歌子招其弟
志和後家鶯脰湖旁仙去吳人爲建望仙亭

漁父詞

見全唐詩餘

樂是風波釣是閒草堂松檜已勝攀太湖水洞庭山狂
風浪起且須還

竇宏餘

常之子官
臺州刺史

廣謫仙怨

天寶十五載正月安祿山反陷沒洛陽王師敗績關門不守車駕幸蜀途次馬

嵬驛六軍不發賜貴妃自盡然後駕行至駱

谷上登高下馬望秦川遙辭陵廟再拜嗚咽

流涕左右皆泣謂力士曰吾聽九齡之言不

到於此乃命中使往韶州以太牢祭之因上

馬索長笛吹笛曲成潛然流涕有司旋錄成

譜及鑾駕至成都乃進此譜請名曲帝謂吾

因思九齡亦別有意可名此曲為謫仙怨其

言為馬嵬之事厥後以亂離隔絕有人自西

川傳得者無由知但呼為劍南神曲其音怨

切諸曲莫比大歷中江南人盛為此曲隨州

刺史劉長卿左遷睦州司馬祖筵之內長卿

遂撰此詞吹之為曲意頗自得蓋亦不知本

事余既備知聊因暇日撰其辭復命樂工唱

之川廣其不知者見全唐詩餘

胡塵犯闕衝關金駱提攜玉顏雲雨此時蕭散君王何

日歸還傷心朝恨暮恨回首千山萬山獨望天邊初

月蛾眉猶自彎彎

康駢

字駕言池州人乾符四年登進士第爲崇文館校書郎後爲田頔客薦授中書舍人有劇

譚錄

二卷

按唐書藝文志作康駢與諸書所引不同疑誤

廣謫仙怨

竇使君序謫仙怨云劉隨州之辭未知本事及詳其意但以貴妃爲懷蓋明皇登駘谷之時實有恩賢之意竇之所製殊不述焉駢因更廣其辭蓋欲兩全其事雖才情淺拙不逮二公而理或可觀貽諸識者

見全唐詩餘

晴山礙目橫天綠疊君王馬前鑾輅西巡蜀國龍顏東

望秦川

曲江魂斷芳草妃子愁凝暮烟長笛此時吹

罷何言獨爲嬋娟

崔懷寶

河南司隸

憶江南

見全唐詩餘

平生願願作樂中
箏得近玉人纖手
子研羅裙上放嬌
聲便死也爲榮

杜牧

字牧之京兆萬年人大和二年進士官至中書舍人有樊川文集二十卷外集別集各一卷

八六子

見全唐詩餘

洞房深畫屏燈照山色凝翠
沉沉聽夜雨冷滴芭蕉驚
斷紅窗好夢龍烟細飄繡衾
辭恩久歸長信鳳帳蕭
疏椒殿閑扁輦路苔侵繡簾
垂遲遲漏傳丹禁薜華偷

悴翠鬟羞整愁坐望處金輿漸遠何時綵仗重臨正消

魂梧桐又移翠陰

張希復

字善繼常山人牛僧孺之壻官至學士

閨中好

見全唐詩餘

閒中好幽磬度聲遲卷上論題肇畫中僧姓支

鍾

輻

江南人咸通末以廣文生爲蘇州院巡江南
堽錄云後周時中選甲科第二後隱鍾山壽
八十餘

李昌齡樂善錄鍾輻年少負才傲物樊若水
妻以女才質雙盛輻登第買一妾自侍曰青
箱久不歸一日過蒲城邑令留飲樓上輻醉
夢其妻以詩怨責曰楚水平如練雙雙白鳥
飛金陵幾多地一去不言歸翌日輻歸至采
石妾暴死及抵家樊已死數月物故之夜乃

輻夢於縣樓之時

卜算子慢

見全唐詩餘

桃花院落烟重露寒寂寞禁烟晴晝風拂珠簾還記去年時候惜春心不喜閑窗繡倚屏山和衣睡覺醺醺暗消殘酒獨倚危闌久把玉筯偷彈黛蛾輕鬥一點相思萬般自家甘受抽金釵欲買丹青手寫別來容顏寄與使知人清瘦

庾傳素

前蜀後主時累官太子少保中書侍郎同平章事蜀亡入後唐授口州刺史

何光遠鑒誠錄天成初明宗宣亡蜀舊宰臣王鎔庾傳素許寂御史中丞牛希濟等各賜一韻賦蜀主降臣唐詩限五十六字鎔等皆諷蜀主荒淫失國獨希濟詩意但述數盡不

謗君親明宗覽詩曰如牛希濟不傷兩國迥
存忠孝者罕矣當日有雍州亞事之拜

木蘭花

見全唐詩餘

木蘭紅艷多情態不似凡花人不愛移來孔雀檻邊栽
折向鳳凰釵上戴 是何芍藥爭風彩自共牡丹長作
對若教爲女嫁東風除却黃鶯難匹配

劉保乂

後蜀戶部郎中諸王侍讀

生查子

見全唐詩餘

深秋更漏長滴盡銀臺燭獨步出幽闥月晃波澄綠
菱荷風乍觸一對鴛鴦宿宿虛櫂玉釵驚驚起還相續

歐陽彬

衡山人仕後蜀累官尙書左丞寧江軍節度使

生查子

見全唐詩餘

竟日畫堂歡入夜重開宴翦燭蠟烟香促席花光顛
待得月華來滿院如鋪練門外簇驂騑直待更深散

許岷

木蘭花

見全唐詩餘

小庭日晚花零落倚戶無聊妝臉薄寶箏金鴨任生塵
繡畫工夫全放却有時覩著同心結萬恨千愁無處
說當初不合儘饒伊贏得如今長恨別

又

江南日暖芭蕉展美人折得親裁翦書成小簡寄情人

臨行更把輕輕撚 其中撚破相思字却恐即疑蹤不
似若還猜妾倩人書誤了平生多少事

林楚翹

菩薩蠻

見全唐詩餘

畫堂春畫垂珠箔卧來揉惹金釵落簾滑枕頭移髻蟬
狂欲飛 笑拖嬌眼慢羅袖籠花面重道好即君人前

莫惱人

陶

穀

字秀實邠州新平人本唐彥謙之孫避晉諱
改姓仕晉知制誥倉部郎中仕漢爲給事中

仕周至兵部侍郎翰林承旨

入宋加戶部尚書有清異錄

鄭文寶南唐近事陶穀奉使恃上國勢下視

江左辭色毅然不可犯韓熙載命妓秦弱蘭

詐爲驛卒女每日弊衣持帚掃地陶悅之與
狎因贈一詞名風光好云云

風光好

好因緣惡因緣祇得郵亭一夜眠別神仙
琵琶撥盡
相思調知音少再把鸞膠續舊絃是何年

徐鉉

字鼎臣會稽人乾符中進士後歸宋爲直學
士院給事中散騎常侍淳化初坐累黜靜難
軍司馬卒於邠有
徐常侍集三十卷

拋毬樂

見全唐詩餘

歌舞送飛毬金觥碧玉籌管弦桃李月簾幙鳳凰樓一
笑千場醉浮生任白頭

又

灼灼傳花枝紛紛度畫旂不知紅燭下照見彩毬飛借勢因期尅巫山暮雨歸

閩后陳氏

名金鳳閩嗣主王延鈞之后

金鳳外傳后於端陽日造彩舫數十於西湖延鈞御龍舟觀之因作此曲使宮女同聲歌之云

樂遊曲

見全唐詩餘

龍舟搖曳東復東采蓮湖上紅更紅波淡淡水溶溶奴隔荷花路不通

又

西湖南湖門綵舟青蒲紫蓼滿中洲波渺渺水悠悠長

奉君王萬歲遊

欽宗皇帝

辛棄疾南燼紀聞二帝被虜至西漢州出長
城塞宿於林下月色微明有番酋吹笛其聲
嗚咽時太上口占一詞曰玉京曾憶昔繁華
萬里帝王家瓊樓玉殿朝喧喧管暮列箏琶
花城人去今蕭索春夢繞胡沙家山何處忍
聽羌笛吹徹梅花謂少帝曰汝賡之乎帝乃
繼韻云云詞成互相感泣

眼兒媚

宸傳二百舊京華仁孝自名家一旦奸邪傾天折地攬
亂琵琶如今在外多蕭索迤邐走塵沙家邦萬里伶
仃父子寒月霜花

蘇易簡

字太簡梓州銅山人太平興國五年進士累
知制誥充翰林學士遷給事中參知政事出
知陳州卒贈禮部尚書有集

釋文瑩續湘山野錄太宗酷愛琴曲十小詞
命近臣十人各探一詞撰一詞蘇易簡探得
越江吟遂賦此詞

越江吟

非烟非霧瑤池宴片片碧桃冷落誰見黃金殿蝦鬚半

捲天香散春雲和孤竹清婉入霄漢紅顏醉態爛漫

金輿轉霓旌影亂簫聲遠

按詞律只載四十九字一調
此多二字當入又一體

陳堯佐

字希元閩中人端拱二年進士歷官同中書
門下平章事卒贈司徒兼侍中謚文惠有愚

邱遣興
等集

言錄希通卷一
湘山野錄皇祐中呂申公致仕仁宗詢卿退
何人可代申公遂引陳文惠仁宗深然之遂
大拜後文惠極懷薦引之德因撰燕詞云云
攜觴相館使人歌之申公笑曰自恨捲簾人
已老文惠應聲曰莫言調鼎事無功二公相
推何等蘊藉

踏莎行

見歷代詩餘

二社良辰千家庭院翩翩又覩雙飛燕鳳凰巢穩許爲
鄰瀟湘烟暝來何晚亂入紅樓低飛綠岸畫梁輕拂
歌塵轉爲誰歸去爲誰來主人恩重珠簾捲

丁

謂

字公言長洲人淳化三年進士天禧
初拜中書門下平章事後貶死崖州

蝶戀花

見歷代詩餘

十二層樓春色早三殿笙歌九陌風光好堤柳岸花遠

複道玉梯相對開蓬島 鶯囀喬林魚在藻太液微波
綠門王孫草南闕萬人瞻羽葆後天祝聖天難老

又

朱闕玉城通閬苑月桂星榆春色無深淺簫瑟簇笙仙
客宴蟠桃花滿蓬萊殿 九色明霞裁羽扇雲霧爲車

鸞鶴驂雕輦路指瑤池歸去晚壺中日月如天遠

王 益

字舜良臨川人安石之父祥符八年進士任蜀之新繁令官至都官員外郎

好事近

催妝

見歷代詩餘

喜氣擁朱門光動綺羅香陌行到紫薇花下悟身非凡
客 不須脂粉污天真嫌怕太紅白留取黛眉淺處畫

章臺春色

吳 咸

字應之天聖二年省試第一
又中拔萃科官至殿中丞

按龔明之中吳紀閭吳應之居小市橋有侍
姬曰紅梅因以名其閨嘗作折紅梅二詞其
喜輕澌初泮一閱傳潘人口春日羣宴必使
優人歌之竹垞以爲杜安世作已選入詞綜

折紅梅

靚商翔征雁疎林敗葉凋霜零亂獨紅梅自守歲寒天
教最後開綻盈盈水畔疎影蘸橫斜清淺化工似把深
色胭脂惟姑射冰姿剩與紅間誰人寵眷待金鎖不
開凭闌先看曾飛落壽陽粉額妝成漢宮傳徧江南風
暖春信喜一枝清遠對酒便好折取奇苞撚清香重與

舉杯重勸

趙 忭

字閑道西安人景祐元年進士乙科通判宣
州召爲殿中侍御史進參知政事英宗朝除
龍圖閣直學士知成都神宗初召知諫院與
王安石議政不協出外改越州致仕卒贈太
子少師
謚清獻

折新荷引

見樂府雅詞拾遺

雨過迴廊圓荷嫩綠新抽越女輕盈畫橈穩泛蘭舟芳
容艷粉紅香透脉脉嬌羞菱歌隱隱漸遙依約回眸
堤上郎心波間妝影遲留不覺歸時淡天碧襯蟾鉤風
蟬噪晚餘霞際幾點沙鷗漁笛不道有人獨倚危樓

點絳脣

秋氣微涼夢迴明月穿簾幙井梧蕭索正繞南枝鵲

寶瑟塵生金雁空零落情無托鬢雲慵掠不似君一作伊

恩薄

杜

衍

字世昌山陰人登進士甲科慶歷中官至集賢殿大學士封祁國公卒謚正獻

滿江紅

退寓南都

見愿代詩餘

無名無利無榮無辱無煩無惱夜燈前獨歌獨酌獨吟

獨笑又值羣山初雪滿又兼明月交光好便假饒百歲

擬如何從他老知富貴誰能保知功業何時了算簞

瓢金玉所爭多少一瞬光陰何足道但思行樂常須早

待春來攜酒殢東風眠芳草

蘇舜欽

字子美其先梓州人家開封易簡之孫耆之

子初補太廟齋郎景祐中進士以范仲淹薦

召試集賢校理監進奏院生祠會除名

居蘇州復起爲湖州長史卒有滄浪集

陳鵠耆舊續聞蘇子美監奏即舊例鬻故官

券以賽神因而宴客獨李定不預遂捃摭其

事言於中丞王拱辰御史劉元瑜迎合時宰

之意興奏即之獄一時英雋斥逐殆盡有一

網打盡之語故梅聖俞有詩云一客不得食

覆鼎傷衆賓蓋指李定也

水調歌頭

滄浪亭

見歷代詩餘

瀟瀝太湖岸淡汀洞庭山魚龍穩處烟霧深鎖渺瀰間

方念陶朱張翰忽有扁舟急檣撇浪載鱸還落日暴風

雨歸路遶汀灣

丈夫志當景盛恥踈閒壯年何事慙

悴華髮改朱顏擬借寒潭垂釣又恐鷗猜鷺忌不肯傍

青綸刺棹穿蘆荻無語看波瀾

劉敞

字原父臨江新喻人慶厯六年進士累遷知制誥拜翰林學士改集賢院學士判南京御

史臺卒門人私謚曰公

是先生有集五十四卷

按晁公武讀書志謂歐陽永叔嘗短原父文於韓魏公葉適習學記言亦稱原父言經旨間以謔語酬永叔積不能平復忤魏公遂不得爲翰林學士今觀歐陽公撰原父墓銘曰惟其文章燦日星雖欲有毀知不能則前言未足爲據也

吳曾能改齋漫錄侍讀劉原父守維揚宋景文赴壽春道出治下原父爲具以待又爲踏莎行詞以侑歡南山賓客東山妓本樂天詩宋卽席爲浪淘沙詞以別原父

踏莎行

蠟炬高高龍烟細細玉樓十二門初閉疎簾不捲水晶

寒小屏半掩琉璃翠 桃葉新聲榴花美味南山賓客

東山妓利名不肯放人閒忙中偷取工夫醉

會布

字子宣建昌南豐人嘉祐二年與兄鞏同舉進士熙寧初除崇政殿說書元豐初累戶部尚書哲宗朝擢同知樞密院事徽宗卽位以定策功拜尚書右僕射崇寧初出知潤州連遭貶竄復提舉嵩山崇福宮卒贈觀文殿大學士謚文肅入黨籍王明清揮麈餘話曾文肅十子最鍾愛外祖空青公有壽詞云云其後外祖果以詞翰名世可謂父子爲知己也

江南好

江南客家有寧馨兒三世文章稱大手一門兄弟獨良眉藉甚衆多推 千里足來自涯洼池莫倚善題鸚鵡

賦青山須待健時歸不似傲當時

按王明清玉照新志載子宣所作馮燕水

調歌頭排遍七章猶存宋時大曲之舊因已錄董穎道

沈

括

字存中錢塘人嘉祐八年進士編校昭文館書籍爲館閣校勘熙寧中遷翰林學士龍圖閣待制坐事謫均州團練使徙秀州復光祿少卿分司南京居潤州有長興集十九卷夢

溪筆

談

趙德麟侯鯖錄元豐中沈存中入翰林爲學士有開元樂府詞云云裕陵賞愛之

翠華引

鵲樓頭日暖蓬萊殿裏花香草綠烟迷步輦天高日

近龍牀

又

樓上正臨宮外人間不見仙家寒食輕烟薄霧滿城明月梨花

又

按舞驪山影裏回鑾渭水光中玉笛一天明月翠華滿陌東風

又

殿後春旗簇仗樓前御隊穿花一片紅雲開處外人遙認官家

韓

維

字持國獻肅絳之弟雍邱人以廕入仕累除知制誥遷翰林學士元祐初拜門下侍郎以太子少傅致仕紹聖中坐元祐黨安置均州徽宗初追復舊官宋史有傳有南陽集

葉夢得石林詩話韓持國雖剛果特立風節
凜然而情致風流絕出時輩許昌崔象之舊
第今爲杜君章所有廳後小亭僅丈餘舊有
海棠兩株每花開時持國輒載酒日飲其下
歲以爲常至今故老猶能言之

踏莎行

次韻范景仁寄子華

見歷代詩餘

歸鴈低空游蜂趁暖憑高目向西雲斷具茨山外夕陽
多展江亭下春波滿雙桂情深千花明煥良辰誰是
同游伴辛夸花謝早梅開應須次第調絃管

雙桂樓
千花口

胡搗練令

夜來風橫雨飛狂滿地閒花衰草燕子漸歸春悄簾幙
垂清曉天將佳景與閒人美酒寧嫌華皓留取舊時

歡笑莫共秋光老

劉 几

字伯壽洛陽人第進士熙寧間官秘書監致仕上柱國通議大夫

朱弁風月堂詩話劉伯壽洛陽九老之一也築室嵩山玉華峯下號玉華庵主有妾名萱章芳草皆秀麗善音律伯壽出入乘牛吹鐵笛二草以蘄笛和之聲滿山谷出門不言所之牛行卽行牛止卽止其止也必命壺觴盡醉而歸嵩前人以爲地仙云

按韓持國南陽集和伯壽秘監云曾陪道論接清歡屈指如今四十年不用笙歌娛上客直將風月待高眠黃花一醉猶能否白首相逢是偶然便欲投官結閒伴家山况與碧嵩連持國家於雍邱距伯壽隱居甚邇也

葉夢得避暑錄話劉几在神宗時與范蜀公重定大樂洛陽花品曰狀元紅爲一時之冠樂工花日新能爲新聲汴妓邵懿以色著秘監致仕劉伯壽精音律熙寧中几攜花日新就邵懿家賞花歡詠乃撰此曲填詞以贈之

花發狀元紅慢

三春向暮萬卉成陰有嘉艷方坼嬌姿嫩質冠羣品共
賞傾城傾國上苑晴晝暄千素萬紅尤奇特綺筵開會
詠歌才子壓倒元白 別有芳幽苞小步障華絲綺軒
油壁與紫鴛鴦素蛺蝶自清旦往往連夕巧鶯喧翠管
嬌燕語雕梁留客武陵人念夢役意濃堪遣情溺

丁

注

字葆光吳興人熙寧六年進士知永州有丁永州集

按方勺泊宅編稱丁葆光名經恐係傳寫之誤

無悶

雪

見陽春白雪

風急還收雲凍又開海濶無人翦水算六出工夫怎

容易剛被郢歌楚舞鎮獨向尊前誇輕細想謝庭詩詠
梁園賦賞未成歡計 天意是則是便下得控持柳稍
梅蘂又爭奈看看漸回春意好起東君未覺預先把園
林都妝綴看是處玉樹瓊枝勝却萬紅千翠

孔武仲

字常父臨江新喻人至聖四十八代孫嘉祐八年進士中甲科官禮部侍郎後坐元祐黨

奪職與兄文仲弟平

仲稱三孔有清江集

按鄧忠臣同文館唱和詩凡十一人常父及張文潛晁無咎李公麟皆預其列又常父昆弟與眉山蘇氏同時並以文章名世故黃魯直稱爲二蘇聯璧三孔分鼎焉

水龍吟

梅

見歷代詩餘

淡烟池館霜飈蕭條又是年華暮黃花老盡丹楓舞因

詞集卷一
江梅初吐點綴南枝暗傳春信玉苞微露凭危闌望斷
誰家素臉遙山遠空凝竚 昨夜一枝開處正前村雪
深幽曙看來只恐瑤臺雲散玉京人去庾嶺寒餘漢宮
妝曉飛堆行雨仗誰人惜取孤芳雅致作春光主

又

數枝凌雪乘冰嫩英半吐瓊酥點南州故苑何郎遺詠
風臺月觀疎影橫斜暗香浮動水寒雲晚笑浮花浪蕩
嬌春萬里空零落愁鶯燕 游子寂寥暮景向天邊幾
回相見玉人纖手殷勤攀贈欲持微盼越使歸來漢宮
妝罷昭華流怨念湘江夢杳窗前疑是此情何限

劉

頴

字吉甫宋詩紀事
吉甫入元祐黨籍

按魏泰臨漢隱居詩話載楊文公談苑言本
朝武人多能詩劉吉甫云一箭不中鵠五湖
歸釣魚大年稱其豪據此則吉甫曾官武職
爵址未詳

陽春白雪云此詞宛有淮海風味惜不名世

滿庭芳

鶯老梅黃水寒烟淡斷香誰與添溫寶釭初上花影伴
芳尊細細輕簾半捲憑闌對山色黃昏人千里小樓幽
草何處夢王孫十年羈旅興與舟前水驛馬上烟村記
小亭香墨題恨猶存幾夜江湖舊夢空淒怨多少銷魂
歸鴉被角聲驚起微雨暗重門

俞紫芝

字秀老金華人流寓揚州少有

高行游王安石之門有敝帚集
魏慶之詩人玉屑有時俗事不稱意無數好
山都上心俞紫芝秀老句荆公手寫於扇山
谷所書釣魚船上謝三郎一帖石刻在金山
寺雞林入貢輒市數百本以歸亦秀老句也
釋道潛參寥集寄俞秀老清老二居士詩云
風谿雲嶺雪消初鳥變春深滿屋除安得故
人同蠟屐石梁斜日看游魚慚愧君家好弟
兄風流宜與晉人并青鞋布襪能從我共入
廬山深處行按清老名澹秀老弟荆公欲使
爲僧不果事見侯鯖錄

阮郎歸

見樂府雅詞拾遺

釣魚船上謝三郎雙髻已蒼蒼簑衣未必清貴不肯換

金章

汀草畔浦花旁靜鳴榔自來好箇漁父家風一

片瀟湘

此句前段第三句六字後段第三句三字四五
六句每句四字與他詞異

詞綜補遺卷一

詞綜補遺卷二

長洲 陶 樸 緝

宋詞四十七首

劉 燾 一首

司馬慆 一首

文 同 一首

韋 驤 二首

侯 蒙 一首

唐 庚 一首

方鄧州 一首

孔 夷 一首

黃大臨 二首

馬 成 一首

蔡 桼 一首

李 光 九首

歐陽珣 一首

胡世將 一首

張擴 一首

胡舜陟 一首

胡仔 二首

顏博文 一首

張燾 一首

黃大興 一首

范周 一首

潘良貴 一首

孫覲 一首

高登 三首

歐陽澈 二首

侯彭老 一首

王樂道 一首

江漢 一首

袁祐 四首

孫肖之 一首

劉

燾

字無言長興人諱之子元祐三年進士官至秘閣修撰有見南山集

上庠錄元祐間馬涓張庭堅等四人擢名太學時號四俊劉燾初補太學生聞而慕之以

刺謁曰不識可當一俊否涓等詭計以困之
曰當預爲一字限於程試中用之善者乃預
旣而程試憲請字涓等曰第一句川將字其
時策問神宗實錄憲對曰秉史筆者權猶將
也雖君命有所不受而況其他乎後果爲第
一聞者服之因目憲爲按屍俊
董史皇宋書錄黃山谷題續法帖劉無言箋
題便不類今人書使之春秋高江東又出一
羊欣薄紹之矣
吳垞五總志曾存之靖康初以少蓬召一日
語垞曰余在林下二十七年僅與世絕常有
人謂余劉無言書朱冲之父碑余歎息曰雖
書鮮于氏碑亦不害其爲顏魯公久之又云
遂銘朱冲墓余復告之曰張曲江爲牛仙客
作誌銘便當以曲江爲不賢耶後數年有客
來自南方云無言之女已嫁朱勔之子余失
色云厯觀方冊夔絕前聞矣

花心動

見樂府雅詞拾遺

偏憶江南有塵表丰神世外標格低傍小橋斜出疎籬
似向隴頭曾識暗香孤韻冰霜裏初不怕春寒要勒問
桃杏嬌姿瞞怎生向前爭得 省共蕭娘去摘玉纖映
瑣枝照人一色澹粉暈酥多少工夫到得壽陽宮額再
三留待東君看管一本無看字都將一本有那字一別
花不惜但只恐南樓又三弄笛管字屬上句

司馬燠字才仲溫公姪孫元祐中舉
賢良科調錢塘尉有夏陽集

蝶戀花

家在錢唐江上住花落花開不管流年度燕子腳將春
色去紗窗幾陣黃梅雨 斜插犀梳雲半吐檀板朱唇

唱徹黃金縷望斷行雲無覓處夢回明月生春浦按才仲向

文

同

字與可梓潼人自號笑笑先生皇祐元年進士集賢校理元豐初出守湖州行至宛邱驛忽留不行沐浴冠帶而逝有丹淵集四十卷

天香引

遊嘉禾南湖

見浙江通志

三月三花霧吹晴見麟鳳滄洲鴛鴦沙汀華鼓清簫紅雲蘭棹青紵旗亭細看來春風世情都分在流水歌聲剪燕嬌鶯冷笑詩仙擊楫揚舲

韋

驥

字子駿錢唐人皇祐五年進士累官尚書主客郎中出爲夔州路提點刑獄有韋先生集

減字木蘭花

見歷代詩餘

人生可意祇說功名貪富貴過景開懷且盡生前有限
盃韶華幾許鵲鳩聲殘無覓處莫自因循一片花飛
減却春

菩薩蠻

和舒信道水心寺會

瓊盃且盡清歌送人生離合真如夢瞬息又春歸回頭
光景非香噴金獸暖歡意愁更短白髮不須量從教
千丈長

侯

蒙

字元功高密人進士及第徽宗時官戶部尚
書同知樞密院進尚書左丞中書侍郎罷知
亳州旋加資政殿學士命知東平府未赴
而卒贈開府儀同三司謚文穆宋史有傳
洪邁夷堅志侯蒙少遊場屋年三十有一始
得鄉貢人以其年長貌寢不之敬有輕薄子

畫其形于紙，薦上引綿放之，蒙見而大笑作
臨江仙詞，題其上，竟一舉登第。年未四十，遂
爲執政。

臨江仙

未遇行藏誰肯信，如今方表名蹤。無端良匠畫形容。
當風輕借力，一舉入高空。才得吹噓身漸穩，只疑遠赴
蟾宮。雨餘時候夕陽紅。幾人平地上，看我碧霄中。

唐

庚

字子西，眉州丹稜人。紹聖間進士，大觀時爲
博士。張商英薦其才，除提舉京畿常平。商英
罷相，貶惠州，會赦復官，承議郎，提舉上
清太平宮，歸蜀道卒。有眉山集附詞。

訴衷情

平生不會斂眉頭，諸事等閒休。元來却到愁處，須著與

他愁 殘照外大江流去悠悠風悲蘭杜烟淡滄浪何

處扁舟

方鄧州

父方勺

泊宅編先子晚官鄧州一日秋風起忽思吳
中山水嘗信筆作長短句遂致仕其序曰子
生浙東世業農總角失所天稍從里閭儒者
游年十八發以充貢凡七至禮部始得一青
衫間關二十年仕不過縣令擢纔南陽教授
紹聖改元實六十有五歲矣秋風忽起亟告
老于有司適所願也謂同志曰仕無補於上
下而退號朝士婚嫁既畢公私無虞將買扁
舟放浪江湖中浮家泛宅誓以此生非太平
之幸民而何因閱阮田曹所製黃鶴引愛其
詞調清高寄爲一闋命稚子歌之以侑尊焉

黃鶴引

生逢垂拱不識干戈免田隴士林書圃終年庸非天寵
才初闖葺老去支離何用浩然歸弄似黃鶴秋風相送
塵事塞翁心浮世莊周夢漾舟遙指烟波羣山森動
神閒意聳回首名韞利鞶此情誰共問幾斛淋浪春甕

孔夷

字方平嘉祐間隱士

王灼碧雞漫志蘭畹曲會孔寧極之子方平
所集序引稱無爲莫知非其自作稱魯逸仲
皆方平隱名如子虛烏有亡是之類孔平日
自號漁臯漁父與姪處度齊名李方叔詩酒
侶也

按參寥集次韻李端叔題孔方平書齋壁云
草堂早晚投君子紙帳蒲團不用收又云不
見諸郎事絃管幽窗惟有讀書聲可以想見
高致

水龍吟

又一體

見歷代詩餘

去年今日關山路疎雨斷魂天氣據鞍驚見梅花的皦
籬邊水際一枝折得雪妍冰麗風梳雨洗正水村山館
倚闌愁立有多少春情意 好是孤芳莫比自不分歌
梁舞地暗香疎影高禪文友清談相對琴韻初調茗甌
催瀹爐熏欲試向此時一段風流付與晉人標致

黃大臨

字元明洪州分寧人山谷兄紹聖中官萍鄉令

復齋漫錄自賀方回爲青玉案詞山谷尤愛之故作小詩以紀之及謫宜州山谷兄元明和以送之詞云云山谷和云烟中一線來時路極目送歸鴻去一曲陽關雲外度山胡聲轉子規言語正是愁人處別恨朝朝連暮暮憶我當筵醉時句渡水穿雲心已許晚年光

景小窗南浦共捲西山雨

青玉案

千峯百嶂宜州路天黯淡知人去曉別吾家黃叔度弟
兄華髮舊山修水異日同歸處尊罍飲散長亭暮別
語丁寧不成句已斷離腸知幾許水村山館酒醒無寐
滴盡空堦雨

七娘子

銀燭畫堂明如晝見林宗巾墊羞蓬首斜插花枝線賒
羅袖須臾兩帶還依舊倒戴休今後也不須更漉淵
明酒寶篋深藏濃香薰透爲經十指如蔥手

宋釋類抄
元明宰廬

陵縣赴郡會座上巾帶偶脫太守諭妓令綴之既畢且俾元明撰詞云

馬

成

字中玉合肥人忠肅亮之子

王明清玉照新志東坡守杭州馬中玉成爲浙漕東坡被召赴闕中玉席間作詞云云東坡和之所謂明朝歸路下塘西不見鶯啼花落處是也中玉爲忠肅之子仲甫猶子也

玉樓春

來時吳會猶殘暑去日武林春色暮欲知遺愛感人深
灑淚多於江上雨歡情未舉眉先聚別酒多斟君莫
訴從今寧忍看西湖擡眼盡成腸斷處

蔡

枏

字堅老南城人宣和以前人沒於乾道庚寅會公卷呂居仁輩皆與之倡和有雲壑隱居集三卷詞有浩歎集一卷趙希弁讀書附志云嘗爲宜春別駕

鷓鴣天

見絕妙好詞

病酒厭厭與睡宜
珠簾羅幙捲銀泥
風來綠樹花含笑
恨入西樓月斂眉
驚瘦盡
怨歸遲
休將桐葉更題詩
不知橋下無情水
流到天涯是幾時

李光

字泰發上虞人崇寧五年進士調開化令改知常熟縣除太常博士遷司勳員外欽宗受禪擢右司諫以言事監汀州酒稅高宗卽位除知宣州進直龍圖閣官至參知政事謚莊簡宋史有傳有莊簡集十八卷

按宋史李光傳泰檜議撤淮南守備奪諸將兵權光極言和不可恃備不可撤檜以親黨鄭億年爲資政殿學士光面折之又與檜詰難上前因丐去中丞万俟卨論光陰懷怨望安置瓊州居八年仲子孟堅坐陸升之誣以私譏國史呂原中又告光與胡銓賦詩倡和

譏訕朝政移昌化軍論文考古怡然自適云
云茲讀瓊山昌江諸詞絕無抑鬱不平之意
而趨附權門者猶欲撫摎其後是可慨也

水調歌頭

丞相李公伯紀寄示水調一闕詠嘆李
太白詞采秀發然余與太白竊有恨焉
因以陶淵明爲答蓋有徵云耳

元亮賦歸去富貴比浮雲常於閑裏端的認得主和賓
肯羨當年軒冕時引壺觴獨酌一笑落冠巾園圃日成
趣桃李幾番春 揖清風追往躅事如新遺編諷詠歛
衽千載友斯人君愛謫仙風調我恨樓船迫脅終汙永
王璘何似北窗下寂寞可棲神

又

昌化郡城之北長橋跨江風月之夕氣象甚勝
庚午八月望夜士友悉起郡會策杖獨遊頗懷

平生故人作水調歌以自釋余自長年粗聞養生之說放逐以來又得司馬子微敘王屋山清虛洞所刻坐忘論一篇因得專意冥坐心息相依雖不敢仰希喬松之壽度未卽死庶有會合之期

獨步長橋上今夕是中秋郡黎恠我何事流轉古儋州
風定潮平如練雲散月明如晝孤興在扁舟笑盡一杯
酒水調雜蠻謳少年場金蘭契忽白頭相望萬里悲
我已十年流晚遇玉霄仙子授我王屋奇書歸路指
蓬邱不用乘風御八極可神遊

又過桐江經嚴灘慨然有感余方力丐宮祠有終焉之志因和致道水調歌頭呈子我行簡

兵氣暗吳楚江漢久淒涼當年俊傑安在酌酒酌嚴光

南顧豺狼吞噬北望中原板蕩矯首訊穹蒼歸去謝賓
友客路飽風霜 閉柴扉窺千載老三皇蘭亭勝處依
舊流水繞修篁傍有湖光千頃時泛扁舟一葉嘯傲水
雲鄉寄語騎鯨客何事返南荒

南歌子

重九日宴瓊臺

佳節多離恨難逢笑口開使君攜客上層臺不用籬邊
凝望白衣來 且看花經眼休辭酒滿杯玉人低唱管
絃催歸去瑣窗無夢月徘徊

又

民先兄寄野花數枝狀似蓼而叢生夜置几案
幽香襲人戲成一闕

南浦秋香過東籬菊未英蓼花無數滿寒汀中有一枝

纖軟吐微馨 被冷烟沉細燈青夢不成皎如明月入
窗櫺天女維摩相對兩忘情

臨江仙

甲子中秋微雨間施君家宴戲贈

畫棟朱樓凌縹緲全家住在層城中秋風露助淒清香
凝燕屨遮莫下簾旌佳節喜逢今夕月後房重按新
聲姮娥端解妬娉婷微雲點綴不放十分明

減蘭

寄贈梅花一枝香色奇絕爲賦此詞

芳心一點瘴霧艱侵塵不染冷淡誰看月轉霜林怯夜
寒一枝孤靜夢破小牕曾記省燭影參差脈脈還如
背立時

詞餘補遺卷二
瓊臺

元夕次太守韻

此詞詞律不載

老閣臨流渺滄波萬頃湧出冰輪星河淡天衢迥絕纖
塵瓊樓玉館偏人間水月精神清江瘴海乘流處處分
身 邦侯盛集嘉賓有香風縹緲和氣氤氲華燈耀綺
席競笑語烘春窺簾映牖眷素娥偏顧幽人空悵望通
明觀闕遙瞻一朵紅雲

漁家傲

予頃在瓊山見桃李甚盛但臘月已開盡
三春未嘗見桃花每以爲恨今歲寓昌江

二月三日與客游黎氏園見桃花一枝羊君
荆華折以見贈恍然如逢故人歸插淨瓶中
累日不凋予旣作小詩同行皆屬和忽憶吾
鄉桃花塢之盛每至花發鄉中人多釀會往
游醉後歌呼今豈復得緬懷疇昔不無感歎
因成長短句寄商叟德矩二友若悟此空花

卽不復以存歿介懷也

海外無寒花發早一枝不忍簪風帽歸插淨瓶花轉好
維摩老年來却被花枝惱 忽憶故鄉花滿道狂歌痛
飲俱年少桃塢花開如野燒都醉倒花深往往眠芳草

歐陽珣

字全美廬陵人崇寧五年進士知鹽官縣以
薦上京師遇國難朝議割河北絳磁深三鎮
地珣極言不可時宰迺使割深州慟哭謂城
上人曰朝廷爲奸臣所誤吾已辨一死來矣
汝等宜勉爲忠義報國金人怒
執送燕焚死之見宋史忠義傳

曾敏行獨醒雜志靖康初全美調官京師時
金人欲求三鎮全美行次關山以樂府寄其
內云云至京有詔許上封事論禦戎之策全
美應詔陳利害奏曰割地敵亦來不割亦來
特遲速有間今日之策惟有戰耳時宰執有
主棄地之議者不悅卽除作監丞使金竟不

復還

踏莎行

雁字成行角聲悲送無端又作長安夢青衫小帽這回
來安仁兩髻秋霜重孤館燈殘小樓鐘動馬蹄踏破
前村凍平生牽繫爲浮名名垂萬古知何用

胡世將

字承公晉陵人崇寧五年進士范汝爲寇閩爲監察御史福建路撫諭使賊平遷尙書右

司員外晉中書舍人坐言者落職尋知鎮江府入爲禮部侍郎改兵部官至端明殿學士

宋史

有傳

按史稱世將爲四川安撫制置使吳玠以軍無糧奏請踵至世將議蜀之饒道溯嘉陵江千餘里半年始達奏用轉般摺運之法公私便之紹興十年金人陷同州諸路皆震乃遣

吳璘田晟出鳳翔郭浩出奉天楊政由赤谷
歸河池不數日璘捷於石壁及扶風金人遠
巡不敢度隴分屯之軍得全師而還世將夙
嫺韜畧讀此詞知其寄慨深矣

醉江月

秋夕典元使院作用東城赤壁韻

見

神州沉陸問誰是一范一韓人物北望長安應不見拋

却關西半壁塞馬晨嘶胡笳夕引贏得頭如雪三秦往

事漢家只數三傑試看百二山河奈君門萬里六師

不發

朝議主和

關外何人回首處鐵騎千羣都滅

富平之敗

拜將

臺欹懷賢閣杳空指衝冠髮闌干拍遍中天獨對明月

張

擴

字彥實一字子敬德興人崇寧中進士授國子監簿遷博士調處州工曹召爲秘書省校

書郎南渡後歷官中書舍人有東窗集十六卷樂府雅詞拾遺云張彥實字智宗

言絲和詩卷二

宋史藝文志張彥實東窗集四十卷詩十卷
揮塵餘話稱擴為著作郎其兄秘書少監楚
材新婚約觀梅西湖擴賦詩有折歸忍負金
蕉葉笑插新臨玉鏡臺之句秦檜見之大稱
賞日旦夕當以文字官相處遷擢左史再遷
而掌外制

殢人嬌

深院海棠誰倩春工染就映窗戶爛如錦繡東君何意
便風狂雨驟堪恨處一枝未曾到手 今日乍晴匆匆
命酒猶及見臙脂半透殘紅幾點明朝知在否問何似
去年看花時候

胡舜陟

字汝明自號三山老人績溪人大觀三年進
士為監察御史建炎中以集英殿修撰知廬
州累官廣西路經畧使封績
溪伯為秦檜所陷追贈少師

茗溪源隱叢話先君平日尤喜作詩手校老
杜集所正舛誤甚多句法暮年深得其意味

漁家傲

見愿代詩餘

幾日北風江海立千車萬馬濤聲急短棹峭寒欺酒力
飛雨息瓊花細細穿窗隙今我綠蓑青箬笠浮家泛
宅烟波逸渚鷺沙鷗都舊識行未得高歌與爾相尋覓

胡仔

字元任舜陟子宣和間仕晉陵令卜
居吳興號茗溪漁隱有叢話百卷

茗溪漁隱叢話賈耘老舊有水閣在茗溪之
上景物清曠東坡作守時屢過之題詩畫竹
於壁間沈會宗又爲賦小詞於後水閣屢易
主今已摧毀久矣遺址正與予小閣相近同
在一岸景物悉如會宗之詞予嘗有句云三
間水閣賈耘老一首佳詞沈會宗無限當時
好風月如今總屬續溪翁

滿江紅

見歷代詩餘

泛宅浮家何處好
茗溪清境占雲山
萬疊烟波千頃茶
竈筆床渾不用
雪蓑月笛偏相稱
爭不教二紀賦歸來
甘幽屏
紅塵事誰能省
青霞志方高
引任家風舴艋
生涯笊簍三尺鱸魚
真好鱠一瓢春酒
宜閒飲問此時
懷抱向誰論
惟箕穎

水龍吟

以李長吉美人梳頭歌填

夢寒鮎帳春風曉
檀枕半填香髻
轆轤初轉欄杆鳴玉
啞啞驚起眠鴨
凝烟舞鸞翻鏡影
開秋水解低頭試整
牙牀對立香絲亂
雲拖地纖手犀梳
落處膩無聲重

盤鴉翠蘭膏勻清冷光欲溜鸞釵易墜年少偏嬌鬢多無力惱人風味甚含情不語下階漫自折花枝戲

顏博文

字持約德州人靖康初官著作佐郎金人立僞楚時充事務官草勸進表南渡初竄澧州

移賀

州

張丑清河書畫舫顏持約晚有鄭虔之貶作山水橫看頗有清致在五羊賣畫自活竟死

瘴鄉

按范公偁過庭錄王履道同先子避地嶺外見有顏持約所藏王維嘉陵江山圖履道以郭藥師叛自燕山召還安置象州故與持約相見於貶所也

西江月

廣師席上

見樂府雅詞拾遺

草草書傳錦字厭厭夢繞梅花海山無計駐星槎腸斷

芭蕉影下 缺月舊時庭院飛雲到處人家而今贏得
鬢先華說著多情已怕

張 燾

玉照新志元符中饒州舉子張生南宮不利
歸妓欲與之俱而張不可約半歲必再至若
渝盟一日則任其從人張偶以親之命後約
幾月始至京師首訪舊遊其隣僦舍者迎謂
曰君非饒州張君乎六孃每恨君失約日託
我訪來期於學舍其母痛折之而念益切前
三日母以歸洛陽富人張氏遂偕去矣臨發
涕泣多與我金錢令俟君來引觀故居畢乃
僦後人生入觀則小樓與室歡館宛然几榻
猶設不動知其初去如所言也生戚愴不能
自持跡其所向百計不能知矣作雨中花云
云盛傳都下云或云卽知常之子子功燾也
按宋史有兩張燾其一字景元漢陽人神宗
朝龍圖閣直學士其一字子公饒之德興人

秘閣修撰根子與玉照新志所稱字子功及父名知常者不同當另屬一人

雨中花慢

事往人離還似暮峽歸雲隴上流泉奈向分圓鏡枉斷
哀絃曾記酒闌歌罷難忘月底花前舊攜手處層樓朱
戶觸目依然從來慣向繡幃羅帳鎮効比翼文鴛誰
念我而今清夜常是孤眠入戶不如飛絮傍懷怎及爐
烟這回休也一生心事爲爾縈牽按詞律收京鏐作與此正同惟前段第二句四字彼此互異後段第二句平仄不甚相合耳

黃大輿

字載萬自稱岷山耦畊翁里未詳宋詩紀事云蜀人

碧雞漫志吾友黃載萬歌詞號樂府廣變風學富才瞻意深思遠直與唐名輩相角逐又

輔以高明之韻未易求也夏幾道序曰惜平語妙而多傷思窮而氣不舒賦才如此反嗇其壽無乃情文之兆歟載萬齋前梅花一株甚盛因錄唐以來詞人才士之作凡數百首命曰梅苑又云賀方回周美成晏叔原僧仲殊各盡其才力自成一家毛澤民黃載萬次之舊有虞美人曲世以爲工載萬追和之壓倒前輩矣詞云

虞美人

世間離恨何時了不爲英雄少楚歌聲起霸圖休一似
口口口口水東流 葛荒葵老蕪城暮玉貌知何處至
今芳草解婆婆只有當年魂魄未消磨

范周

字無外仲淹姪孫贊善大夫純古之子工詩詞士林甚推之所居號范家園安貧樂道未嘗屈折於人

中吳紀聞雙蓮堂在木蘭堂東舊芙蓉堂是也至和初光祿呂大卿濟叔以雙蓮花開故易此名政和中盛密學季文作守亦產雙蓮范無外詞云云又云盛季文作守時頗嫚士嘗於元宵作寶鼎現詞投之遺酒五百壺其詞播於天下每遇燈夕諸郡皆歌之

木蘭花慢

美蘭堂畫永晏清暑晚迎涼控水檻風簾千花競擁一
朶偏雙銀塘盡傾醉眼訝湘娥倦倚雨霓裳依約凝情
鑑裏並頭宮面高粧蓮房露臉盈盈無語處恨何長
有翡翠憐紅鴛鴦妬影俱斷柔腸淒涼芰荷暮雨褪嬌
紅換紫結秋房堪把丹青對寫鳳池歸去攜將

潘良貴

字義榮一字子賤號默成居士金華人政和五年以廷試第二人釋褐爲辟雍博士愿官

至徽猷閣待制提舉亳州卒贈

左朝奉大夫有默成集五卷

鶴林玉露潘子賤自少至老出入三朝前後
在官不過八百六十餘日所居僅蔽風雨郭
外無寸尺田有磨鏡帖行世言讀書者將以
治心養性如用藥磨鏡若積藥鏡上而不加
磨治未必不反爲鏡累張禹孔光是已世以
爲名言

滿庭芳

中秋

夾水松篁一天風露覺來身在扁舟桂花當午雲捲素
光流起傍篷窗危坐飄然竟欲到瀛洲人世樂那知此
夜空際列瓊樓 休休閒最好十年歸夢雨眼鄉愁謾
贏得蕭蕭華髮盈頭往事不須追諫從今去拂袖何求
樽餘酒持杯顧影起舞自相酬

孫 覲

字仲益晉陵人政和進士以蔡攸薦爲侍御

史蔡氏敗率同列劾之金人圖汴專附和議

進翰林學士汴都被受金人女樂爲欽宗草

表建炎初貶陝州再謫嶺外黃潛善汪伯彥

復引之使掌詔命後以賊罪斥提舉

鴻慶宮有鴻慶居士集四十二卷

按書錄解題稱覲生於元豐辛酉卒於乾道

己丑年八十九可謂耆宿矣而其生平出處

則至不足道程史亦云仲益鴻慶集大半誌

銘蓋諛墓之常不足詫獨武功大夫李公碑

乃儼然一瑞耳亟稱其高風絕識以不獲見

爲大恨言必稱公殊不爲忤趙與時賓退錄

須摘其作莫开墓誌極論屈體求金之是倡

言復讐之非作韓忠武墓誌深詆岳武穆作

萬俟卨墓誌極表其殺武穆一事爲顛倒悖

繆則覲之怙惡不悛當時已有公論矣

浣溪沙

見樂府雅詞拾遺

弱骨輕肌不耐春一枝江上玉梅新巡簷索笑爲何人

素影徘徊波上月碎香搖蕩竹間雲酒醒人散夢仙

村

高登

字彥先漳浦人宣和間爲太學生金人犯京師登與陳東上書乞斬六賊紹興二年廷對極意盡言無所顧忌授富川主簿兼賀州學事滿秩召赴都更上疏萬言及時議六篇秦檜惡其譏已授靜江府古縣檜父生檜於是地以不建祠託以他事編管容州卒後追復迪功郎宋史有傳

有東溪集二卷

宋史葉顥傳友人高登嘗上書譏切時相名捕甚急顥與同邸撻令逸去登曰不爲君累乎顥曰以獲罪固所願也卽爲具舟舟移乃去

好事近 黃義卿畫霜竹

瀟灑帶霜枝獨向歲寒時節觸目干林憔悴更幽姿清

絕 多才應賦得天眞
落筆驚風葉從此
綠窗深處有一梢涼月

又 再和餞別

送客過江村
況值重陽佳節向晚西風蕭瑟
正離人愁絕
尊前相顧惜參商
引十分蕉葉回首高陽人散負西樓風月

又 又和紀別

飲興正闌珊
正是揮毫時節霜幹銀鈎錦句有壁間三絕
西風特地颭秋聲
樓外觸殘葉匹馬翩然歸去向征鞍敲月

歐陽澈

字德明崇仁人建炎初徒步走行在伏闕上封事請誅汪黃等與陳東俱死於市紹興中

贈祕閣修撰有飄

然先生集六卷

見歷代詩餘

玉樓春

年時醉倚溫溫玉妬月精神疑可掬香絲篆裊一簾秋
潏潏十分浮蟻綠興來笑把朱絃促切切含情聲斷
續曲中依約斷人腸除却梨園無此曲

小重山

紅葉傷心月午樓襲人風細細遠烟浮懽騰醉眼不禁
秋追舊事拍塞一懷愁心緒兩悠悠東陽消瘦損甚
風流擬憑仙枕夢中遊無眠久通夕數更籌

侯彭老

長沙人

周煇清波雜誌建中靖國侯彭老以太學生上書得罪詔歸本貫綴小詞別同舍云云雖曰小挂而意氣安閒如此煇頃得於故老此詞既傳各齋俱厚贐其行亦傳入禁中降旨令改正屬同獲譴者不一乃格後繇鄉貢竟登科甲

踏莎行

十二封章三千里路當年走徧東西府時人莫訝出都忙官家送我歸鄉去三詔出山一言悟主古人料得皆虛語太平朝野總多歡江湖幸有寬閒處

王樂道

字詠祖見咸淳臨安志

按宋時王樂道有三一爲詠祖一爲王陶宗史有傳過庭錄稱其子實字仲弓爲韓持國

詞話卷二
增持國南陽集有樂道示長句次韵詩一爲
王萃穎人官奉議見王得臣塵史卽王性之
之父也

風流子

見陽春白雪

東風長是客簾櫳靜燕子一雙飛看花塢日高翠陰護
曉柳塘風細綠漲浮漪腸斷處渭城春樹遠江國暮雲
低芳徑聽鶯暗驚心事畫檐間鵲試卜歸期小樓凝
竚地疎簾下幾度對說相思記得菱花交照素手曾攜
有新恨兩眉向誰說破芳心一點惟我偏知休爲多情
瘦却重有來時

江

漢字朝
宗

蔡條鐵圍山叢談政和初江朝宗獻魯公詞
時兩學盛謳播之海內魯公喜將進呈命之
以官爲大晟府製撰又云江朝宗有宋史學
惜乎猥以長短句辱其名
沈作喆寓簡西安諸江多名士有江漢字朝
宗買奴適姓于因命之日于海蓋取江漢朝
宗於海也其好戲謔如此

喜遷鶯

昇平無際慶八載相業君臣魚水鎮撫風稜調燮精神
合是聖朝房魏鳳山政好還被畫轂朱輪催起按錦轡
映玉帶金魚都人爭指 丹陛常注意追念裕陵元佐
今無幾繡袞香濃榮耀滿門朱紫四方具瞻師表盡道
一夔足矣運化筆又管領年年烘春桃李

袁 綸

朱弁續觥觥說政和中袁綸爲教坊判官一日爲蔡京撰此詞上見之改女眞二字爲漢宮蓋當時已與女眞盟於海上矣而中外未知帝思其語故竄易之也
鐵圍山叢談歌者袁綸宣和間供奉九重嘗言東坡與客游金山適中秋夕天宇四垂一碧無際俄月色如畫共登妙高臺命綸歌其水調歌頭曰明月幾時有把酒問青天歌罷坡爲起舞而顧問曰此便是神仙矣

傳言玉女

見樂府雅詞拾遺

眉黛輕分慣學玉眞梳掠艷容可畫那精神怎貌鮫鮪
映玉鈿帶雙穿纓絡歌音清麗舞腰柔弱 宴罷瑤池
御風跨皓鶴鳳凰臺上有蕭郎共約一面笑開向月斜

裏朱箔東園無限好花羞落

玉真續訛說作女真

魚游春水

秦樓東風裏燕子還來尋舊壘餘寒微透紅日薄侵羅綺嫩筍才抽白玉簪細柳輕翠黃金蘂鶯嚶上林魚游春水
屈曲闌干遍倚又是一番新桃李佳人應念歸期一作應怪歸遲梅粧淡洗鳳簫聲杳沉孤雁目斷澄波無雙鯉雲山萬重寸心千里

五絲結同心

珠簾垂戶金粟懸窗家接浣沙溪路相見露陰下一鉤月恰在鳳凰栖處素瓊撚就宮腰小花枝裊盈盈嬌步

新粧殘滿腮紅雪綽約片雲欲度 塵寰豈能留住唯
只愁化作綵雲飛去蟬翼衫兒薄冰肌瑩輕罩一團香
霧綵牋巧綴相思苦脈脈動憐才心緒好作箇秦樓活
計吹簫伴侶 原本末句只四字一本增要待二字

清平樂

畫堂晨起來報雪花墮高捲簾櫳看佳瑞皓色遠迷庭
砌 盛氣光引爐烟素草寒生玉珮應是天仙狂醉亂
把白雲揉碎

孫肖之

王銍雪溪集有送孫肖之還緇雲詩蓬蒿頻
歲掩柴關再喜相逢一破顏遊子年華紅葉

老幽人風味白雲間那知篋裏書成後猶作
溪邊興盡還流落天涯俱避地念君更入萬
重山

點絳脣

見樂府雅詞拾遺

烟洗風梳司花先放江梅吐竹邨沙路脈脈遙寒雨
醉魄吟魂無著清香處愁如縷繫春不住又折冰枝去

詞綜補遺卷二